

# Su Kedua' Sulat ni Pablo tu nga Getaw TESALONICA

## Piuna di Kedua' Sulat ni Pablo tu nga Getaw Tesalonica

Naa, kagina mipuitan na ni Pablo sulaten su nga samasakupen ditu Tesalonica, ta' mai piwitanen dun pelum ki sinulaten kini? Pu' kiin, su nga sakup ni Kristu dia Tesalonica, migdua'dua' dawig delendeman nilan mekatag di kelusad puli' nu Kaunutan si Isukristu. Kaas mauya'an ni Pablo pementekenen sug delendeman nilan ditu. Pigwalinen dinilan pu' su Kaunutan si Isus, ndi' lumusad puli', subay duuni kuntranen mauna dateng. Tinitulu'en dailan dema pu' subay penggengeten nilan su kesalig nilan tu Megbebaya' pia ta' alanduni gikteb nu kekegetay nilan muka' kelegenay nilan.

---

**1** <sup>1</sup>Naan si Pablo, muka' su ngag dumau si Silas muka' si Timoteo, puitan ku amu sulat, yamu nu pikumpulan nu nga sakup ni Kristu ditug lunsud Tesalonica suminalabuuk na ditu Gama' ta Megbebaya' muka' tu Kaunutan ta si Isukristu.

<sup>2</sup>Penenebiin ku tu Gama' ta Megbebaya' muka' tu Kaunutan ta si Isukristu, begayan amu niin tulung muka' pianan ginaa.

### Mengkum si Kristu di Kelusaden puli' dini

<sup>3</sup>Naa yamu Mingumpated, gebii gendaw subay pekpeladpeladan nami su Megbebaya' mekatag diniu. Bantang na daan mekpaladpalad ami diniin, pu' migisegi kesalig niu, miksamet dademai keglinelaatay niu.

<sup>4</sup>Kaas sa' meksimba ami dia nga pikumpulan nu nga sakup ni Kristu, pingangya' nami amu dinilan, pu' miktigel amu di kekeget diniu, muka' nda' mpalini kekpetuud niu pia milegenan amu.

<sup>5</sup>Naa, ki pigbetad niu muka' kektigel niu kia, iin su tu'us pu' melepengi ginukuman nu Megbebaya', kaas baalen amu niin bantang sumakup

ditu Keglekaunutanen. Pu' saba' nu kesakup niu tu Keglekaunutanen, milegenan amu nemun. <sup>6</sup>Muka' penggulaulaan pa nu Megbebaya' su gempia, pu' pelegetanen su nga mikpeleget diniu, <sup>7</sup>muka' peleliinen amu nga pilegetan, sampay yami pa pagid. Penggulaulaan nu Megbebaya' sa' metua' puli' su Kaunutan si Isus genat tug langit, tendugan nu nga ginuungan sesugu'en nu Megbebaya' getaw langit muka' liga' gapuy, <sup>8</sup>adun pelebu'anen su nga mimilas tu Megbebaya' muka' mimilas tu Gempia Petenday mekatag di Kaunutan ta si Isus. <sup>9</sup>Iini pelabu' di nga memilas, pelaatan ilan di nda'i tamanen, pu' peliu'en ilan nu Megbebaya' tu Kaunutan ta, muka' tu kelengas nu pegbaya'en muka' ginuungen. <sup>10</sup>Mpenggulaula di gendaw nu ketua'en puli', pu' iini metua' dun si Isukristu, pededengegen nu piglegetawanen, muka' pegbesaan dadema nu ngag launan mekpetuud kampu' amu, pu' mituudan amu di ginukit nami.

<sup>11</sup>Kaas tatap nami amu penenebiay, pu' baalen nu Megbebaya' su pegbetaden niu mbantang di ke'enggaten diniu. Penenebiin da nami dema, puun tu ginuungen pekpelasenen sug launan gempia delendeman niu sampay sug launan penggulaulaan niu puun tu kesalig niu. <sup>12</sup>Ma'antu mpededengeg niui ngalan nu Kaunutan ta si Isus, muka' pededengegenen damu dema. Mpenggulaula pebian di tulung nu Megbebaya' su pektemuyen ta muka' nu Kaunutan ta si Isukristu.

### Metua' su Pinulay

**2** <sup>1</sup>Naa, Mingumpated, ki kelusad puli' nu Kaunutan ta si Isukristu muka' ki kekpungun ta diniin, penengiin nami diniu, <sup>2</sup>ndi' megdua'dua'ig delendeman niu dun. Ndi' damu dema melibuleng pu' minateng na daw ki gendaw kia. Mabu' laung dun nu getaw pu' naan daw miuktalu' dun saanan ku migwali talu' nu Megbebaya', sa' migukitu, sa' daw sinulatu. <sup>3</sup>Pia ta'i mektalu' dun, ndi' amu pekpelimbung. Pu' ndi' pa mateng ki gendaw kia subay mauna memilas gupia tu Megbebaya' su nga getaw, muka' metua' dadema su pinulay, su ginandam pengain ditug linaw gapuy. <sup>4</sup>Ki pinulay kini, iin su kumuntra tug launan pemilangen nu getaw diwata muka' tug launan pektemuyen nu getaw. Mekpelabaw dig launan nilan sampay mangay diag Balay Penedapan tu Megbebaya', megingkud dia, engkenenen iini Megbebaya'.

<sup>5</sup>Nda' ba niu medelendem pu' su saanan ku dia niu, iini tinalu'u diniu? <sup>6</sup>Daan na niu misuunan pu' nemun duuni megbelabag di kuleg nu pinulay sampay mateng nai gempia timpu. Ki pinulay, metua' dayun, <sup>7</sup>pu' kuminulegkuleg na su gandang pigbuni betad nga getaw mekesesala', laak mibebelebagan pa sampay mawa' na su migbelebagan dun. <sup>8</sup>Mbuasan dayun su pinulay, muka' petain nu Kaunutan ta si Isus pebian di giup, binesaan di tiag nu ketua' nu Kaunutan. <sup>9</sup>Bena' metua' su pinulay, puun tu pegbaya' ni Satanas. Penggulaulaneni mekesalebu' tu'us

muka' ginuung, adun mpegbelusanen su nga getaw. <sup>10</sup>Peglimbunganen di gininisan melaat su nga getaw gasal nilan mpeditug linaw gapuy, pu' nda' nilan telima'ay su metuud muka' nda' nilan mauya'ay, tekaw buus megawen ilan sia. <sup>11</sup>Ma'antu buangen ilan gupia nu Megbebaya' mpeglimbungan, kaas metuudan ilan dun sug balus. <sup>12</sup>Deksu'anen, ukuman ilan nu Megbebaya' muka' pelebu'anen dadema sug launan ndi' mekpetuud tu tantu metuud muka' sug leliagen dun sug dupangan.

### Tindu' amu nu Megbebaya' Megawen

<sup>13</sup>Naa yamu pelum, uu Mingumpated petailen nu Kaunutan ta, subay mekpaladpalad ami lelayun tu Megbebaya' mekatag diniu. Pu' su nda' pa mbaali gekleb langit bu' lupa', tindu' amu niin megawen pibian di ginuung nug Balakaten. Megawen amu daan, pu' binaal amu niin piglegetawanen pibian dadema dig Balakat nu Megbebaya' muka' miksekat tu kekpetuud niu tu metuud. <sup>14</sup>Inggat amu nu Megbebaya' megawen pibian di Gempia Petenday inukit nami diniu, adun mpeduma amu dig dengegan nu Kaunutan ta si Isukristu muka' tu kegbasa diniin. <sup>15</sup>Kaas, ndi' megdua'dua'ig delendeman niu di titulu'an nami diniu, ndi' niu selingaway, pia di ginukit nami, sa' su sinulat nami.

<sup>16-17</sup>Naa, penenebiin nami tu Kaunutan ta si Isukristu muka' tu Gama' ta Megbebaya', penguliksegan amu niin muka' pepentekeneng delendeman niu mekatag dig launan gempia penggulaulaan niu muka' pektelu'en niu, pu' petailen ita niin muka' tulungen ita niin, kaas mengulikseg ita di nda'i tamanen, muka' bigayan ita niin gempagen pedetengen.

### Penenebiay niu ami

**3** <sup>1</sup>Naa, uu Mingumpated, duun pai telu'en ku diniu. Sa' yami, kelelaat penenebiay niu ami, adun medali' mesigwag gusayi gukiten nami mekatag di Kaunutan ta muka' metelima' dadema gupia maa' nu mipenggulaula diniu. <sup>2</sup>Penenabi damu dema, megawen ami di nga mekedupang muka' di nga getaw lelayun melaati gulaula nilan, pu' kana' nug launan getawi suminalig tu Kaunutan ta.

<sup>3</sup>Laak su Kaunutan ta, meseligan iin. Pementekeneni kekpetuud niu muka' penendingan amu niin di Palin. <sup>4</sup>Kagina pingmetuudan ami niin, iini kesalig nami mekatag diniu, pinggulaula na niu su tinitulu' nami diniu, muka' penggulaulaan pa niu.

<sup>5</sup>Penenebian nami amu isegen nu Kaunutan ta dig delendeman niu sug lelaat dinita nu Megbebaya' muka' su kektigel niu miksekat dini Kristu.

### Peksituges amu Mengimbaal

<sup>6</sup>Naa Mingumpated, kaas tinitulu' nami amu pegliaun niu su nga samasakup niu melesa', su nga ndi' mengimbaal, su nga ndi' dumunut

tu tinitulu' nami diniu. Tinitulu' nami amu, pu' pigwekilan ami nu Kaunutan ta si Isukristu. <sup>7</sup>Misuunan niu su pinggulaula nami su saanan nami ditu niu. Subay penunggilingan niu ami, pu' yami, nda' ami peglela' ditu. <sup>8</sup>Nda'iduni ginalap nami gaan atawaka pektulugan nda' nami biaday. Gebii gendaw minimal ami mengimbaal, adun ndi' nami amu medeligan. <sup>9</sup>Pia yami siaig bantang menengi diniu sukayan, nda', pu' adun mbaal niu ami gempia lendasan. <sup>10</sup>Ndi' ba metuud, su saanan nami dia niu, iini tinitulu' nami diniu, sa' duuni getaw ndi' mengimbaal, ndi' dema niu paanen? <sup>11</sup>Pu' midengeg nami duun dawig duma niu melela', ndi' daw mengimbaal. Iin laaki temba'enen, su kenginampenen tu nda' naig labeten dun. <sup>12</sup>Naa, su nga sakup ma'nia, puun tu kegwakil dinami nu Kaunutan ta si Isukristu, titulu'an nami ilan muka' pegad nami dinilan, subay mengimbaal ilan di kegleketubu' nilan, muka' ndi' ilan mesasaw di pegbenwa.

<sup>13</sup>Yamu dema Mingumpated, ndi' niu lukasay gulaulaay su gempia. <sup>14</sup>Sa' duun diniui ndi' dumunut tu sinulat nami kini, pedelendem niu dun ndi' amu megduma dun, adun mpiid. <sup>15</sup>Laak dagid, ndi' niu iin pemilangay kuntra niu. Subay titulu'an niu ma'niin nu ngudan niu.

#### Katapusan Sinulatu diniu

<sup>16</sup>Naa, su Kaunutan ta, penenebiin nami diniin pepiananeni ginaa niu gebii gendaw, pia ta' alanduni kebetang niu, pu' iini puun gupia nu pianan ginaa. Muka' penenebiin da nami dema diniin, megduma iin diniu, launan niu.

<sup>17</sup>Naan si Pablo. Ki pinirmaan ku di sulat kini, naani suminulat dun. Kiai tu'us dig launan sinulatu pu' suminulatu dun, kiaig betadu sumulat.

<sup>18</sup>Penenebiin nami pa pagid ditu Kaunutan ta si Isukristu begayan amu niin tulungen gebii gendaw, launan niu.

Daal daitu.

*Pablo*